



P. 895
895
1-14

夫赫應公年譜

附 4 册 書 號 110597

先恭勤公年譜

先恭勤公年譜

諭賜祭文

維咸豐八年十一月庚戌朔越九日戊午

皇帝遣禮部右侍郎楊式毅致祭於原任禮部尙書

徐澤醇之靈曰

朕維六卿職重寅清允屬乎秩宗一德謨明申命
式崇乎懋典溯蓋勤以念舊嘉樹績而酬庸馨薦
特頒彝章用賁爾原任禮部尙書徐澤醇持躬謹
慎植品端方由甲榜而起家分銓曹而筮仕一麾
出守移風聿播循聲七事宣猷飲水彌彰介節爰

全言
卷一
陳時臬旋擢維藩東魯持旌整綱紀而官箴頓肅
西川授鉞靖萑苻而民氣胥恬凡蓋臣建事之勤
皆

先帝知人之哲朕躬纘緒眷念成勞值入覲於彤廷俾
鳴珂於紫禁召爲宗伯掌邦禮而班崇命典會闡
總文衡而望峻屬以陪京奉使鉅典襄勤歷鷺堠
以遄征遑恤戴星之瘁拜螭坳以覆命猶殷就日
之忱甫獎宣勞忽聞嬰疾假期再給方圖珍攝而
就痊遺疏遽披彌惜老成之長逝禔頌經被奠遣

親臣諭禮官而卹典優加賞後嗣而恩綸特沛於
戲履聲入聽尙懷雅範於容臺箕尾歸眞倏掩寒
芒於斗宿尙其來格歆此苾芬

諭賜碑文

朕維職司邦禮端資鴻碩之儒命奉簡書每恤駢
征之使旣薦馨於雕俎宜勒績於貞珉用賁龍章
俾光螭碣爾原任禮部尙書徐澤醇宅衷謹恪垂
範端凝標藻鑑於銓曹清通夙著剖竹符於巴郡
教化旁敷釐鹽筴而弊剔蠹胥慎筦庫而風嚴魚
鑰爰陳臬事旋理藩條山左建牙吏治務從安靜
川中移節民生樂就撫綏溯

先皇之恩遇最優逮朕躬而倚毗尤切容臺典禮惟寅

而風檢咸欽瑣院衡文正己而冰心益著茲者陪
都銜命鉅典襄勤卿月高懸總春官而式敘使星
朗耀值冬令而邁臻甫獎勵勞遽聞痰疾連番休
沐期微恙之速痊一旦淪徂竟頽齡之莫挽覽遺
章而增惜賜經被以飾終莫遣親臣賞延後嗣考
其行誼謚曰恭勤恭以持身表靖共而罔懈勤能
宣力統清慎而兼該於戲在公矢夙夜之忱駿奔
懋績念舊錫褒崇之典馬鬣增輝勒此豐碑昭茲
來許

先恭勤公年譜卷一

男 彬 恭 輯

府君姓徐氏諱澤醇字梅橋晚年自號樂天翁
先世籍隸江西餘干縣至明嘉靖年間遠祖文
亨公以遼東定遼後衛官籍登戊戌科進士後
遂遷籍遼陽三傳至可魁公從

世祖章皇帝入關官至都督使隸漢軍籍是為始遷之
祖二世祖諱效忠未仕三世祖諱萬詵康熙癸
卯科舉人官陝西寶雞縣知縣時吳三桂叛隨

大將軍圖公海軍中救脅從難民數萬人皆以
太高祖官

贈資政大夫太高祖諱湛恩官至河道總督罷歸卜居
津南靜邑東鄉大侯莊高祖諱國璟官江南高
涇縣知縣曾祖諱紱乾隆甲午科舉人官江西
樂平縣知縣皆以府君官

贈光祿大夫忠厚相承代有陰德至先大父

贈光祿大夫諱鎬隱居不仕惟以積善訓子爲事先大
母

贈一品太夫人于太夫人恭儉仁厚稱於族中生三子

長諱昌興

封奉政大夫

贈光祿大夫次諱昌起

贈朝議大夫

晉贈光祿大夫嘉慶戊辰

恩科舉人山西交城縣知縣府君居幼

乾隆五十二年丁未十月十二日巳時府君生於靜
海縣東鄉大侯莊

乾隆五十三年戊申二歲

乾隆五十四年己酉三歲

乾隆五十五年庚戌四歲

曾王父光祿公選授江西樂平縣知縣先大父
隨任之官府君侍往

乾隆五十六年辛亥五歲

曾王父卒於官先大父扶柩回里府君侍歸
乾隆五十七年壬子六歲

是年府君始入塾讀書先大父親督課之

乾隆五十八年癸丑七歲

乾隆五十九年甲寅八歲

乾隆六十年乙卯九歲

嘉慶元年丙辰十歲

嘉慶二年丁巳十一歲

嘉慶三年戊午十二歲

嘉慶四年己未十三歲

嘉慶五年庚申十四歲

嘉慶六年辛酉十五歲

嘉慶七年壬戌十六歲

嘉慶八年癸亥十七歲

嘉慶九年甲子十八歲

嘉慶十年乙丑十九歲

是年府君始入京應童試未售府君自潞河附小舟回里行至津門距家五十里自念微名不立無以仰慰親心乃擔囊徒步而歸先大父母見而憐之慰勉有加焉

嘉慶十一年丙寅二十歲

嘉慶十二年丁卯二十一歲

嘉慶十三年戊辰二十二歲

應童試取入庠生第五名

應鄉試報罷先伯父朝議公舉於鄉

嘉慶十四年己巳二十三歲

嘉慶十五年庚午二十四歲

應鄉試中式第二百三十名舉人座主為劉芸

房先生名權之陳鍾溪先生名希曾朱靜齋先

生名理房考為帥海門先生名承瀚首題君子

博學於文約之以禮次題故君子以人治人改
而止三題其爲氣也至大至剛以直養而無害
則塞於天地之間詩題正誼明道得明字

嘉慶十六年辛未二十五歲

應禮部試報罷

嘉慶十七年壬申二十六歲

三月先妣惠太夫人來歸

嘉慶十八年癸酉二十七歲

嘉慶十九年甲戌二十八歲

應禮部試報罷回里日侍先大父母膝下仰承
色笑每率太夫人手調甘旨以進夜則誦讀不
倦逮黎明家人趁集猶爲啟門出車率以爲常

嘉慶二十年乙亥二十九歲

嘉慶二十一年丙子三十歲

九月

不孝彬生

嘉慶二十二年丁丑三十一歲

應禮部試報罷

嘉慶二十三年戊寅三十二歲

嘉慶二十四年己卯三十三歲

應禮部試報罷

四月 不孝桐生

嘉慶二十五年庚辰三十四歲

應禮部試中式第一百七十九名進士座主爲

盧南石先生名蔭溥黃左田先生名鉞吳雲樵

先生名芳培善樂齋先生名慶房考爲聞人春

臺先生名熙首題仁者先難而後獲次題成己

仁也成物知也性之德也三題以善服人者未

有能服人者也以善養人然後能服天下詩題

惠澤成豐歲得成字覆試二等

殿試三甲

朝考入選用主事籤分吏部文選司行走時先大

父隱居津南樂善不倦府君登第族人來賀僉

謂先大父積德之報先大父曰吾所望於子若

孫者豈以一第一官光耀閭里哉善善相承廣

行利濟吾願慰矣府君通籍後日日趨公寒暑

雨雪無閒晝則檢校案牘暮則循繹例文務求

公允偶與長官議事不合必反復明辨衷於是
而後已長官以是重之同僚尤服府君識力吏
胥無敢爲奸

是年寓京師內城鐵門保安寺內

道光元年辛巳三十五歲

道光二年壬午三十六歲

四月聞先大父訃奔喪回里

道光三年癸未三十七歲

府君里居守制課不孝桐讀書

道光四年甲申三十八歲

七月服闋入都供職仍寓保安寺內

道光五年乙酉三十九歲

四月卜宅於正陽門內東交民巷迎先大母于

太夫人來京就養先妣太夫人率不孝等隨侍

登程中途先大母患頭眩不便乘車時先伯父

朝議公偕行遂奉先大母回里太夫人率不孝

等入都

七月府君學習期滿奏留以主事候補

道光六年丙戌四十歲

四月先大母自津門水程來京先伯父朝議公
大挑一等以知縣用分發山西

道光七年丁亥四十一歲

四月葬先大父於廣渠門外楊家莊祖塋昭墓

道光八年戊子四十二歲

道光九年己丑四十三歲

十月隨侍郎裕公恩前往奉天查辦事件 是
年春

上巡幸盛京錦縣知縣傅鍾瑑循照舊規向鋪戶借錢

墊辦大差武童姜殿魁從中需索不遂藉端控
告

上命裕公恩往按其事裕公以府君名奏請隨往鞫得

實擬如律

十一月差旋

道光十年庚寅四十四歲

府君幫辦文選司事時有陝西某報捐布政司
經歷欲掣分四川求府君爲地府君嚴詞拒之

諭以應聽籤掣勿受吏欺及掣籤某果得四川籤府君疑之白長官啟贖籤皆四川也向規籤掣省分皆配定封固籤掣後不復啟視贖籤吏緣以爲奸自是贖籤皆公同啟視其弊遂絕

道光十一年辛卯四十五歲

五月堂兄

相

應童試入庠第一名府君具豚酒

集宗族戚友歡宴奉觴爲先大母壽先大母顧而樂之

隨侍郎寶公興前往山東查辦事件 先是山

東巡撫訥爾經額奏卸任知縣王枚覈算交代情急自戕請將前任蘭山縣知縣張希哲革職究辦

上命寶公興往按其事實公以府君名奏請隨往讞定

張希哲有心朦混致釀人命遣戍如律

七月差旋

十二月爲先大母八十壽府君率

不孝

等舞綵

稱觴未數日而先伯父奉政公訃音至府君友愛性成悲戚殊甚慮傷先大母心諱弗敢白遲

久始言之

道光十二年壬辰四十六歲

九月先伯父朝議公因公罷職回京

十二月補稽勳司主事

道光十三年癸巳四十七歲

五月升文選司員外郎掌文選司印

先伯父朝議公卒於京時先大母適中暑證病

益劇府君偕太夫人躬奉湯藥百方慰解旋就

痊愈人咸謂至孝所感云

十二月舉行京察府君保列一等未及引

見先大母棄養府君擗踊哀毀幾至滅性大斂後朝夕

奠哭益哀蓋痛祿養之弗永也

道光十四年甲午四十八歲

在京守制

三月祔葬先大母於楊家莊祖塋昭墓

五月 不孝彬不孝桐 應童試同入庠

道光十五年乙未四十九歲

在京守制

四月 不孝桐 歲試取一等二名補廩膳生員

道光十六年丙申五十歲

四月服闋供職

十月補稽勳司員外郎

十一月 不孝彬 授室

道光十七年丁酉五十一歲

三月掌考功司印

四月 不孝彬 科試取一等二名補廩膳生員 不

孝桐 考取選拔生第一名

六月隨尙書奕公經湯公金釗審辦御史周銘

恩囑託陶澐條陳天津關稅一案鞫得實擬如

律

八月升文選司郎中仍掌考功司印

九月堂兄 相 舉於鄉自先伯父朝議公出任邑

宰府君督課綦嚴迨朝議公歿府君恩育教誨

有加聞報府君欣慰特甚

十一月 不孝桐 授室

道光十八年戊戌五十二歲

全言 卷一
四月堂兄 相 聯捷成進士改翰林院庶吉士府

君猶督課不倦殷殷以植品勵學爲勛

六月 不孝桐應

朝考取一等第二名覆試取二等第一名引

見用七品小京官分工部學習

道光十九年己亥五十三歲

八月郎中俸滿截取引

見以繁缺知府用蒙

召對旋

簡四川重慶府知府越日謝

恩

召對移時訓勉倍至

十月府君子身赴任

孫承烜生不孝桐出

道光二十年庚子五十四歲

正月府君抵四川重慶府任 郡城爲水陸交

衝人煙稠雜貧民生有子女不能撫育多流爲

乞每至冬寒道殣相望府君憫之議立收養局

首捐廉二百兩並飭屬量力捐助得銀九百餘兩卽於十月舉行收養十四歲以下男女日給柴米更製棉衣袴散給全活無算至次年春暖令各散去謀衣食其殘廢無依者留養之死者施棺瘞之次年經費充裕購屋數十椽別男女以居之顏曰保赤所又置田數十畝以資公用詳立章程酌定每年捐數刊碑立於郡署並分立於保赤所示垂久遠

四月堂兄相授職編修

九月不孝彬舉於鄉不孝桐挑取膳錄

是年秋靈雨爲災吾鄉田禾盡被淹沒至冬人乏食有死者府君聞而憫之命籌銀米按戶口多寡分給族人赤貧者厚賙之並分其贏以濟他鄉全活甚眾自是每歲暮賙給京鄉族人率以爲常

十二月刊感應金鑑陰隲金鑑書成頒發學宮
道光二十一年辛丑五十五歲

五月

上命各省督撫於道府廳州縣中擇潔己愛民誠心任
事確有實據者出具切實考語酌保候簡節相
寶公興以府君名入告考云醕正廉明才識深
遠不苛察不粉飾以實心行實政所屬皆難治
之區而事無不舉洵爲郡守中出色之員奉

硃筆圈出調取引

見

六月

不孝桐

三年學習期滿奏留本部

七月刊覺世金鑑成頒發學宮

八月

孫承煜

生不孝桐出

十二月赴省領文赴部旋補授山西河東道
府君自重慶啟行日士民遮道攀轅絡繹數十
里不絕有焚香呼祝者曰願太守復來斯土活
吾民寶節相興聞之謂僚屬曰徐君真此地福
星也

道光二十二年壬寅五十六歲

四月到京

五月由吏部帶領引

見奉

旨著回任越日謝

恩

召對移時令於次日仍遞膳牌

上復召見

垂詢家世甚詳

六月赴山西河東道任

不孝彬

侍往

時當炎

暑過平定州經平陽驛天氣微陰旋小雨土人云凡遇此等天氣宜防山水驟發府君未之信

早尖後乘肩輿先行

不孝彬

攜行李遲二刻許

始啟行至未申間過小河數道水纔沒脛未幾溜漸疾水漸深過河未里許忽聞驚呼聲僕從皆張皇失色曰水至矣府君回首望見平地水頭壁立六七尺許汩汩而來急上山坡始駐足水勢洶涌由坡腳下過約兩時許水勢漸平緩然尚深有三尺餘令輿夫肩輿緩行數里至村落宿焉

不孝彬

從後至河之東望見水勢猛大

未敢過河亦止道旁旅舍中次日水盡落

不孝

彬始行已刻至村舍府君尙未行也村人咸稱
賀曰此必有大陰德若非分兩起行盡沒洪波
矣到省小住數日卽赴河東任時河東鹽務疲
累日甚商人紛紛告退公保富戶充認富戶懼
累輒重賂州縣求免眾商亦賄求歇業其實累
商准退卽應責成新商充認引課當事者嚴提
新商勒充法如訊重囚府君憫之謂屬吏曰此
豈政體當別籌良策監掣同知楊公作梅曰河
東鹽務本歸地丁彼時河南一帶鹽斤暢銷西

商圖利慫慂當事招商承辦二十餘年以來年
清年款迨江南改行票鹽裁汰商人其充淮南
者大半皆河東之商淮南一裁則河東之商亦
日見疲敝商旣疲敝不能不准退累商另籤新
商新商延不到案率皆州縣賄放蓋一經充當
每年須賠一二萬兩不等是以眾商皆願以所
賠之數少輸之官求免而官亦利之此現在實
情也無已則歸地丁爲善府君深然之遂上之
大府未及行而有調江南河庫道之

命

七月調補江南河庫道

十月抵江南河庫道任河庫爲支放總匯歲用銀三百數十萬兩其實用到工者僅十之四大半入私橐司是職者亦以出納之遲早量其數而先取盈焉奢靡成風習不爲怪府君潔己率屬慎出納節糜費冀挽積習南河歲修向有墊辦一項安瀾後備文支領各廳共計九十餘萬兩率皆浮冒相沿已久府君隨時隨事勉力

樽節不避嫌怨越明年九月霜降後庫存銀僅二十餘萬兩而各廳領款至三十餘萬兩府君持不與道廳嘖有煩言府君曰庫存無多備不虞耳無他意也僉曰已逾霜降可無他慮府君卒未之允不數日高郵決口河帥星夜前往札府君多備銀兩爲堵築用倉卒立辦於是各廳咸服府君先見府君曰何先見哉凡事豫則立諸君未之思耳工竣河帥回浦府君因力言墊辦一項亟應節省河帥允之遂詳定嗣後各廳

每年墊辦之數不得過二十八萬兩計歲省六十餘萬兩河工積弊稍清

十一月 不孝桐 請假四月奉太夫人並率諸子

赴府君任所省視

道光二十三年癸卯五十七歲

四月 不孝桐 假滿奉太夫人並率諸子回京

六月堂兄 相 充福建鄉試副考官道經袁浦宿

府君署中冬月差旋復留住五日豫製衣裘為

北上禦寒之用

八月 孫承焯生 不孝桐 出 孫承熾生 不孝彬 出

十月立慈幼堂收養十四歲以下男女分兩所

棲之委裏河廳同知王公國佐經理一如重慶

章程府君首倡此舉各廳量力捐助事未逾月

而成

十二月太夫人赴府君任所命 不孝桐 留京堂

兄 蔡 侍往

是年以搶護南河險工及捐辦江北礮局蒙

恩交部議敘

年譜 卷一 七
道光二十四年甲辰五十八歲

十二月立豐濟倉 清江雖無城郭人煙稠密儼然大都向未設有義倉偶值荒歉米價翔貴採買緩不濟急價更倍之府君擬建義倉以備不虞商之廳員王公國佐等皆以爲便遂先捐銀二千兩並囑各廳量力捐助得銀二萬餘兩置隙地一區建倉廩數十間名曰豐濟約可儲穀二萬石府君復捐廉買穀三千石各廳續捐共集成二萬石委王公國佐經理其事每年出

陳易新一如常平舊規自春興建閱十月歲事

道光二十五年乙巳五十九歲

正月擢湖南按察使

不孝桐 由本部奏留以額外主事用

三月到京請

訓

召對三次

陞辭赴任太夫人以楚南路遠不赴任所 不孝等均留

京侍母

六月抵湖南按察使任

道光二十六年丙午六十歲

是年自正月至四月無雨多方祈禱罔應四月
府君設壇步禱越三日甘霖普被士民感幸共
慶有秋先是萬方伯貢琛欲立義倉以濟荒歉
商諸中丞未允後爲府君言之府君曰是乃藩
司專責何商爲萬公慮獨力難成府君爲倡捐
穀一千石萬公亦捐千石時鹽道楊公炳莖在
坐亦願捐千石府君謂萬楊二公曰我等已有

三千石穀再將此意告知首府縣省中可得五
六千石外郡可捐二萬石措之裕如矣萬公仍
欲商之中丞府君曰事不容已何商爲於是遂
決方大旱之未雨也府君每檢理刑獄必曰得
毋有奇冤乎接見紳僚必殷殷詢問且曰如有
冤獄上千天和殃止及余勿苦吾民未數日遂
訪有楊令私斃人命之事先是候補知縣楊某
有二妾周氏駱氏周先駱後周生一女駱非良
家女而楊寵信之駱素不檢周不附因多方搆

名言 卷一 三
陷值楊令請假回籍駱遂逐周及女並污以不
潔名有曾在楊署教讀師某知其由收養之以
待楊歸是年二月楊回省駱多方誣周楊信之
教讀師某聞楊歸送周及女至楊寓駱乃主謀
築土牢錮周不與飲食數日斃府君廉得實告
知中丞中丞默然越日府君傳集府縣飭拘楊
寓家人委讞局研訊承審者以中丞故各懷顧
忌兩日未得一詞府君提署親鞫不用刑訊盡
得其情復委知府魁公聯通判裕公麟逐一研

究至更餘府君復至委審處勘訊各僕役仰指
屋檐互相告語詰其故咸曰日暮時有青蛇盤
檐漏下眾謂之曰汝有冤乎頭可下垂果下垂
又曰冤已白矣頭可上伸果上伸眾皆歎異秉
燭視之已渺府君既審明情事毫無疑義遂卽
揭參中丞據詳入奏迫於不得已也府君執法
嚴明率屬廉而有威以故令出惟行事無不舉
嘗曰余任楚臬時事多掣肘然卒不能爲人掣
動此其明驗也

十一月刊儒門法語陳文恭公手札節要書成
頒發學宮

道光二十七年丁未六十一歲

四月刊紀慎齋先生集易傳求雨文頒發通省
慎齋先生名大奎江西臨川人由選拔舉孝
廉仕至四川合州刺史所歷有政聲精理學尤
邃於易是年春不雨屢祈雨仍未溥長沙令陳
秉初爲先生門下士出其祈雨文呈於府君府
君謂其文義節取繫辭卦象本諸先天是神於

用易者因設壇誠禱如儀次日濃雲密布一雨
五晝夜遠近均霑闔省紳吏咸稱神異府君卽
刊其文頒發通省嗣是在東在川每遇旱祈雨
必用其儀無不立霈甘霖並刊布其文於兩省
至今猶奉行云

九月 孫承燮生 不孝桐出

十月升山東布政使
十一月府君請

陛見卽啟程北上途次奉

旨著赴新任無庸來京欽此

府君交卸湖南臬篆省中僚屬向有公送程儀
三千金府君卻之啟行後川資匱乏尙欠捐穀
銀五百兩未卽交清行至湖北與劉姻丈源濬
貸銀千兩償穀價餘作路費道經河南值災荒
飢民徧野府君每過州縣必以辦賑爲勸咸苦
無力府君立出銀五十兩作倡導凡過五邑用
銀二百五十兩囊無餘貲猶以力不從心爲歉
比至大梁災荒更甚男女皆黃馘槁項多不能

起立府君睹之惻然時藩司王年丈簡邀府君
飲府君復向貸銀一千三百兩以千兩爲省城
煮賑費前所過州縣許而未給足者卽以餘銀
轉寄之同人謂府君何多情若是府君曰此不
過盡吾不忍之心而已區區千金能贍幾人聞
者咸爲動容

十二月抵山東布政使任 不孝彬 赴任所省視
不孝桐 由本部奏留以候補主事用

道光二十八年戊申六十二歲

二月太夫人率孫承烜承煜隨赴任所讀書

三月刊忠告全書 府君到濟南後辦公餘閒

輒搜輯遺書得見尹竹農先生所刻元張文忠

公風憲忠告廟堂忠告牧民忠告各書喜其議

論切實簡要允足風厲有位遂付梓分贈僚友

六月擢授山東巡撫 先是東省吏治廢弛官

吏競尙逢迎宴會動費數百金其他大率稱是

以故州縣虧挪日多地方糜爛益甚盜賊充斥

置若罔聞上下相蒙苟安無事科道訪聞得實

彈章入告撫藩臬皆膺嚴議

上特簡侍郎張公澧中爲巡撫府君爲藩司府君與張

公先後到任潔己率屬力挽積習時方春讌府

君延中丞及臬運道飲席止入盞飲罷謂坐客

曰飽乎咸曰飽矣府君曰祇此已足充腸競尙

奢靡何爲由是東省官吏始習儉約不敢公然

爲無益之費矣方府君任藩司時

上命清查庫虧有張澧中徐澤醇皆朕親信大臣無所

用其迴護之

諭府君仰荷

主知力圖報稱鉤稽庫款纖悉不遺雖案牘紛繁日無暇晷從不假手功曹屬吏無從售私未半年盡得底蘊適巡撫張公因病出缺府君遂奉是命自是察吏理財緝盜賊整嵯網諸大端府君責無旁貸益兢兢以不克稱職爲懼奏懇

陛見面請

聖訓得

旨著俟明年春閒再行奏請欽此

奏報東省緝捕情形 略言緝盜之要固宜覈獲犯之多寡以示勸懲尤貴嚴拏首要兇渠使羣匪震懾斂迹地方不復有搶劫之案方爲切實成效臣到任後訪查各屬地方雖較前稍形安謐而在逃要犯尙未悉擒遺孽一日不盡除則緝捕一刻不容懈臣惟有振刷精神督飭文武設法搜捕務將著名要匪盡數弋獲不准以捕獲零星夥匪充數塞責儻各州縣仍蹈舊習致有疏防諱匿之案立即糾參以仰副

聖主除暴安良之至意得

旨所見甚是若一言了事何益之有務當認真覈實持之以久勉之勉之欽此

奏請緩徵臨清等州縣衛歉收地方新舊額賦
詔如所請行

七月覆奏東省盜賊情形 略言地方既有搶劫之案則緝捕不容一刻鬆懈上年捻匪肆擾獲犯七百餘名究出首要情重各犯分別正法根株尙未盡絕深恐地方官吏事過懈生捕務

又漸廢弛臣惟有懷遵

諭旨督率所屬文武各員認真搜緝務將著名逸匪悉數弋獲遇有疏防失事隨時密訪嚴參使各牧令不敢重蹈諱匿因循積習得

旨除暴安良當務之急文武疲玩第一可恨汝初膺重任當如何振作報國安民朕拭目以待也欽此

奏報兩省接壤地方匪徒聚眾兵役格捕情形
略言沂州府與江蘇淮徐等府接壤民風强悍較曹州府屬爲尤甚茲據沂州府屬日照縣

唐際中稟報探有南來匪徒九十餘人乘馬持械肆行訛掠當卽知會營汛併力兜捕弋獲多犯該管文武疏於防範本屬咎無可辭惟一經聞信督役追捕據實稟報不敢蹈從前畏葸諱匿惡習請暫緩參處責令分投購捕以贖前愆得

旨允從尋緝獲首要各匪六十餘名提省嚴審擬斬梟流徒有差

奏報東省鹽務情形 略言東省鹽務既受准

私浸灌銀價又復增昂商本虧折疲累日甚參商纍纍積引益多未參各商觀望不前勢將課運兩誤現雖設法督商趕運而時迫勢促積重難返是以前撫臣張澧中曾有官商兩辦之議此時情勢非變通舊制萬難補救更非廉明幹練實心任事之運司亦恐徒法不行臣惟有督同運司竭盡愚誠悉心籌議務求妥善報

聞

奏報洋盜伺劫商船飭鎮道實力防捕情形

略言東省洋面夏秋之交屢有閩廣匪船闖入
境內搶劫商船本年春閒江蘇海運糧船由東
洋赴天津尙無疏虞指日運船載貨南旋易爲
盜匪窺伺正在嚴檄防護旋據水師游擊陳振
疆稟報閩廣盜船乘風游弋已有被劫之案當
卽密札登州鎮景琳一面查參一面親駕戰船
出洋督捕臣伏查東省洋面上下三千餘里水
師前後兩營額設兵九百餘名不敷分防舊有
戰船限於經費年久未修出洋巡捕多係雇用

商船未能多載礮位防捕殊難得力現已札飭
鎮臣添僱堅大船隻募帶沿海壯勇出洋分路
扼要防捕務將游弋匪船悉數擒獲盡法懲辦
以靖洋面而安商旅報

聞復以洋面商船迭遭劫掠水師將弁玩忽不前請將
游擊陳振疆等革職仍責令隨營協捕

詔如所請行

奏請緩徵青州府臨朐縣被雹災區舊欠錢糧

詔如所請行

全譜 卷一
八月奏緝獲著名匪犯過半並續獲捻幅各匪
三十六名提省究辦得

旨不可以捕獲不少稍形懈弛常川加意務期盡絕根
株欽此

九月奏續獲捻幅各匪六十名提省嚴究仍飭
屬嚴密購捕遺匪得

旨言行相符懍勉爲之欽此

奏報出省校閱營伍 略言登州海洋屢有劫
案水師將弁防捕廢弛臣到任後循例出省閱

伍先由省東武定青州萊州各府依次校閱卽
至登州親勘海疆形勢督同鎮道籌商巡洋事
宜並採訪府廳州縣官聲政績分別甄覈以振
戎行而肅吏治得

旨秉公細心任勞任怨切忌姑息不振勉益加勉看汝
趨向耳欽此

奏東省鹽務受淮私浸灌運銷失時以致引滯
課絀請免考覈州縣處分

下部知之

年譜 卷一
奏東省各屬麥收歉薄請將漕項麥石改徵粟
米又奏請緩徵濟南臨清府州所屬州縣衛被
水被蟲災區新舊正賦

詔如所請行

十月奏親勘海疆形勢請添備捕盜快船以資
巡緝 略言東省洋面近年屢有閩廣匪船闖
入劫掠夏閒匪船乘風北駛商船迭遭搶劫甚
有擄人勒贖之事臣到任後訪聞情形一面飭
鎮道雇船集勇嚴行巡防一面將巡防不力之

水師後營游擊陳振疆等奏參革職勒緝如限
滿不獲卽枷示海疆以儆怠玩猶恐文武各員
狃於積習不知振作是以臣於閱伍之期先赴
登郡親勘督辦接見文武各員詳詢情形東洋
上下三千餘里惟登州府屬之蓬萊福山文登
榮成四縣爲全洋扼要失事各案多在此處水
師將弁自嚴參以後雖知懍懼而臨事思奮倉
猝無備良由戰船重笨非風不行雇用商船旁
無遮護又不能多載礮位盜船皆係閩廣小鳥

船帆槳兼施設遇風色不順港汊紛歧盜船使
槳如飛兵船待風而行往往追捕不及臣與登
州鎮德通登萊青道英桂暨闔營水師將備公
同熟商皆請添製捕盜快船以補戰船之不及
擬造船制長六丈餘尺寬一丈八九尺深七尺
餘大桅高五六丈兩旁配用楸木槳十六支四
圍配用魚網棉被以禦槍礮其式與奉天蓋州
紅頭小鳥船相同衝風破浪行駛靈便訪之沿
海商民均稱此船逆風捕盜人力能施較戰船

尤爲適用眾議僉同應卽如式捐造約計造船
一隻需銀一千二百兩水師前後兩營南北東
三汛共需船二十五隻合計造費及添製器械
等項共需銀三萬五千兩各官捐廉辦理眾擎
易舉惟轉瞬來年開洋捐項一時措備不及臣
回省後飭藩司先行籌款趕辦據藩司劉源灝
詳稱司庫現有廟工生息一款暫可借動合無
籲懇

天恩俯念海洋緝捕緊要准於司庫現存廟工生息

項下借支銀三萬五千兩以爲造辦快船經費
所借銀兩由臣與藩臬兩司及道府州縣酌量
攤廉歸補期於七年攤竣還款此項既由捐辦
其承造用費保固年限亦由本省自行覈辦請
免造冊報銷至此項船隻定限來春出洋巡哨
以前備用水師現有戰船仍循舊制俟新船造
成如果駕駛得力或將舊制變通節省糜費之
處另行奏明辦理至此外一切緝捕事宜如招
募水勇及清查口岸以杜奸民接濟洋匪之處
臣已逐一嚴飭道府督率該管州縣乘此冬令
暇豫未雨綢繆妥爲籌備

詔下部議行

奏覆部駁盤查追補章程 略言東省各屬虧
款臣在藩司任內酌議盤查追補章程詳經前
撫臣張澧中具奏嗣經部議以原奏各條尙有
未經分晰之處駁令另行妥議覆奏臣督同藩
司劉源灝逐條覆覈如追繳虧項分別限期一
條原議虧銀四萬兩以上而無截止之數統限

年譜 卷一
八年完繳並未指明每年完銀若干本屬疏漏
應請虧銀四萬兩以上至五萬兩爲止均革職
留任摘去頂帶統限八年完繳每年各按虧數
完繳八分之一依限遞完及半請先開復頂帶
若數逾五萬卽照侵虧本例專案參辦至統案
分限追繳各員原議一限不完卽照統限屆滿
不清一律辦理係指分釐未完者而言但亦聲
敘未甚明晰應請限追各員各按分限應完之
數每限屆滿如分釐未完及雖完而不及分限

銀數三分之一卽照統限屆滿不完參革監追
若每限俱能完至三分之二其未完銀兩併入
下限著追俟統限屆滿覈其已未完分數再行
參辦又如盤查無著酌提節省一條查酌提節
省與攤扣養廉名異而實同前以盤查無著之
款亟須彌補故不得已於攤廉之外復有酌提
節省之請惟東省各官養廉既有攤扣海防軍
需三成又有接扣盤查借墊二成歲入無幾若
再攤提誠如部駁不但提解不前有名無實更

金譜 卷一
三
恐舊欠未補新虧續增臣與藩司劉源灝再四
熟商此外實屬無款籌補惟有將現在盤查無
著之款併入前案接扣二成養廉依次彌補俾
現任各員辦公有資庶可杜絕新虧免滋流弊
又如存司領款覈扣備抵一條查各屬存司領
款其名不一如夫馬閏月及工程准銷等項不
勝臚舉要皆實存在司之項各屬新舊交代卽
以存司應領之款列抵應交正雜解款故有欠
解扣抵之繁前以各屬有隱匿欠款輒將領款
具文領回是以此次嚴定章程先儘欠款扣抵
蓋亦杜絕虧缺之一端事係外辦故部臣無由
悉其原委疏入

敕部議行

奏續勘濟甯等州縣衛被水被雹請緩徵新舊
正賦

詔如所請行

是月休致山東鹽運使韋公德成以府君挾嫌
勒告不准支給鹽務面封銀兩等詞赴都察院

控告事

聞

上命侍郎福公濟詹事府左庶子駱公秉章往按先是
府君涖巡撫任時以東綱疲累商情渙散運銷
失時加價正課兩案奏銷完不及半因與署運
司劉公源灝悉心熟商查通綱向有公捐面封
公費一款爲一切外支外銷之需歷任撫運節
壽規皆出於此府君以爲陋習相沿亟應裁革
且課款緊要尤當力節浮費專顧正課遂以節

存面封捐款爲引地累商撥完加價銀二萬九
千六百六十餘兩正課銀一萬一千七百七十
餘兩又於票綱公項撥抵票商未完銀二千九
百七十餘兩兩案奏銷一時報竣維時韋公德
成患病請假府君親往驗看察其精神恍惚言
語支離因告以鹽務疲累亟宜整頓病體非宜
韋不得已始呈請開缺府君據情上

聞韋深銜之交卸後仍索面封規費不知已歸入正課
韋益忿回京後砌詞控告

欽差按鞫得實並查出歷任撫運收受陋規狀歷任撫運皆褫職章亦與焉案結章以懷疑妄控遣戍軍臺

十一月覆奏將弁協緝章程 先是御史戴公綱孫奏直省捕務請定將弁協緝章程

上命各省督撫體察情形覈議具奏府君奏言盜匪劫掠爲害地方該管文武員弁疏防參處定例已極周備臣謹就東省情形悉心參覈省西之兗沂曹濟等府州與直隸及江省淮徐等屬聯界

爲捻幅匪徒出沒之區然西南三百里屹然並列兩鎮衝途則有參游專營接壤則有鎮臣會哨如果文武協力巡防奸宄何從託足道光二十五六等年曾以曹州府屬之濮范鄆及濟甯直隸州所屬之嘉祥等縣防捕捻匪抽撥兩鎮弁兵於各該處添設專汛本年又以濟甯州屬之魚臺縣南陽鎮濱臨河湖緊接江省沛縣由臣與司道府州捐廉酌給經費令兗州鎮於每年冬季派撥員弁帶兵駐防其省東之登萊等

府風氣較淳捕務稍簡近以閩廣匪船闖入北
洋致往來商船頻遭劫掠臣奏明捐造捕盜
快船以資追緝並嚴檄陸路文武員弁分扼口
岸杜絕內地奸民接濟各在案惟是緝捕機宜
不患立法未周實患奉行不力水路將弁因循
怠緩文武歧視各不相謀實爲綠營通弊卽如
上年東省捻幅各匪聚眾劫掠固由各州縣未
能隨地防範先事查拏而兇匪之敢於恣意橫
行亦實窺破文武隔膜不相聯絡所致彼時曾

以汛兵不足因酌調各營馬步兵派員統帶巡
防以壯聲勢而此輩更以地方非其所轄痛癢
不關惟知優領盤費於無賊處所往來游巡無
裨實用臣到任後節經指明前項情弊嚴檄通
飭並於接見各營將領面加訓飭務令督率弁
兵力圖振作猶恐習與性成非一時文檄告誡
所能革因思文武同城雖不相節制而武夫健
卒未嘗不各具天良不可以法驅實可以誠感
諄諭道府州縣平日與同城武員務須遇事推

全言 卷一 三
誠布信激之以公義聯之以私恩情意相孚緩
急自可有備武員不掣文員之肘則武員所轄
之兵卽文員所治之民未有不聽地方官驅策
者要在信服於平時則臨期調遣指臂相應設
遇大夥兇匪武弁統兵於前文員督役於後旂
號一揮左右並進合力夾攻何難制勝至勦散
兇匪之後搜捕竄匿零匪文員派役躡訪尤須
武弁伏兵邀截遏其奔逸之路總之文武勦力
同心卽有醜類不患不立時撲滅如武員中實

有遇事退縮及桀驁不馴之人准道府州縣密
稟由_臣分別查明撤參_臣仍隨時隨地留心查
訪如牧令與營弁稍涉廢弛卽行分別糾參該
管道府及統轄鎮將如不能各率所屬認真整
頓亦當據實參劾庶期僚屬協寅恭之誼黜陟
無偏袒之私上下相維行之以漸而持之以久
或可挽回陋習得

旨果能覈實認真何患莠不除而善不安總在封疆大
吏肯實心與否耳朕無所論之而又誰不知之看汝

辦理有效耶無耶欽此

奏採買倉穀以備積儲 略言東省各州縣常社兩倉存穀歷因水旱偏災賑濟撥運其專參虧缺各案欽奉

恩詔豁免應歸缺額買補惟於一歲之中買補數十年動缺之穀誠恐司庫正款不敷動支庫貯與倉儲並重自非酌盈劑虛分年籌補不足制緩急之宜今按各州縣缺額多寡計已買穀十五萬二千石較歷屆採買幾增兩倍臣訪察各屬

情形亦未便再行多派致令糧價驟昂有妨民食至各屬舊存倉穀臣在藩司任內曾嚴定章程務令積貯在倉不准以銀代穀臣已札飭各道於盤查新穀之便將舊存常社倉穀一併盤查結報儻日後查有虧缺卽惟該道是問庶期舊存之穀不致續虧新買之穀亦不致有名無實至地方設立義倉以備荒歉原屬善政值此年豐穀賤野多蓋藏自可乘時捐辦惟愚民惜費僅顧目前現雖諄切勸諭仍須聽從民便不

得稍涉勒派致滋紛擾

下部知之

奏新復引商正值催徵新課未能依限完納實非有心玩誤懇請展限催繳得

旨允從復以參商積引益多請變通舊制

上命大學士耆公英侍郎朱公鳳標偕府君查辦尋查明各商未完正課請參追彌補東商未完加價銀兩請展緩完繳並籌議變通章程奏言東省鹽務受弊已深其引地票地或展轉出租或認

商抵欠或商逃引懸無人行運或子店關閉難禁食私且綱總之易滋盤踞浮費之貽誤正供積引之以舊混新認商之以此冒彼或聽其懸引而稅課幾至虛懸或任其漏私而緝捕竟爲故事種種情形甚於他省兩月以來確查遠近引地綜覈古今成法如課場地丁攤徵係雍正七年以後成案東省惟近海之安邱等十八州縣行之此外山河間阻西南各引地距場千有餘里販運不前若按畝攤徵則賦有加增而民

多淡食設遇偏災不能不隨正供蠲緩至就場收稅其法始於唐臣劉晏近惟淮北河湖水運節節可通票鹽設局驗貨參用其意東省則水陸俱艱若行票招商恐無人承領當此力求變通期於可久惟有先納課而急惟正之供參官運而無虛懸之引成本已減積欠可清加斤則商有餘貲減價則民多沾利從此認真整頓奉行得人庶可挽積習而振澁綱

敕部議行

奏山東章邱齊東兩縣連年荒歉請緩徵舊欠漕糧

詔如所請行

奏請留 不孝彬 在署幫辦家務得

旨允從先是 不孝彬 請假來東隨侍在署至是假滿府

君例得奏請

十二月奏請分別減免文武疏防處分 略言東省曹沂等屬民情獷悍攘奪之風積習相仍上年省西各屬秋收稍歉地方匪類勾結蔓延

以致六府二州失事之案多至一百二十四起
文武各員未能先事豫防予以嚴議咎有應得
惟各該員於參後竭力搜捕盡法懲辦現在未
獲之案僅止六起且全案著名兇匪如陳禿仔
等十餘犯業已悉數就擒首惡伏誅零匪竄散
道路肅清且究出陳禿仔在直豫江蘇等省拒
捕多次破獲鄰省要案合無籲懇

俯准將已獲各案

敕部照例分別減議免議其未經被獲六案照尋常

盜案按限參處免其嚴議

敕部議行

奏查明各商未完歷年正課加價等款請分別
參追彌補得

旨著交耆英朱鳳標提集各商逐款查明定擬欽此
奏新復各商應完銀兩尾欠無幾商力疲累新
舊各款難以同時並徵請再緩三月完繳得

旨允從

借漕運總督楊公殿邦奏參濟後幫領運千總

鄭安邦勒索兌費請革職拏問

上命嚴鞫尋按得旗丁勒索幫弁徇庇各情革鄭安邦
職奏入得

旨仍當永不敘用欽此

奏請借項修築汶上東阿兩縣民埝 略言兗
州府屬汶上縣境南旺湖在運河西岸汶水入
運南北分流於此湖建設十二斗門受汶源之
匯注撒運河之沙淤向有圈湖民埝爲西北數
百里民田保障曾於道光二年借項興修迄今

已歷二十餘載漲水衝刷坍塌堪虞又泰安府
屬東阿縣境張秋鎮運河西岸民埝自道光三
年興修之後惟十九年內擇要開修本年夏秋
淫雨埝工益形殘塌雖民埝例應民修而附近
居民歷年積歉力有未逮不得不先爲籌款趕
辦以資保衛 臣 遴委司道確切勘估兩案計實
需銀三萬二千八百三十二兩五錢八分四釐
應請借項辦理攤徵歸款該二縣濱臨湖河運
道民田關係甚重實係應修要工惟有籲懇

全言 卷一 三
天恩准於司庫地丁項下照數借支分飭各該縣勒
限來歲春融重運未入境前一律趕修完竣得

旨允從

奏籌捐緝捕經費 略言東省地方遼闊水陸
交衝緝捕事宜最關緊要派撥兵役懸賞購線
舊有緝捕生息一款不敷常年支用現在省西
則搜捕捻幅餘匪省東則防緝洋盜所需經費
較前尤鉅既未便作正開銷亦未便盡責州縣
今擬^臣與三司五道十府兩直隸州及濱樂分

司並州縣中力所能及者歲共捐銀一萬五千
兩以本年冬季爲始由藩司於各官養廉內扣
存司庫以備隨時擇要支發^臣前於籌議海洋
緝捕案內擬捐造捕盜快船二十五隻需銀三
萬五千兩奏明暫於司庫廟工生息項下借動
銀三萬五千兩分年攤廉歸補今卽於此項捐
款內每年劃出銀五千兩歸還前項借款下餘
銀一萬兩卽作爲搜捕捻幅各匪專款遇有需
用由臬司核明詳^臣批准飭知藩司照數支發

則緝捕歲有專款辦理不致掣肘得

旨允從

奏拏獲通盜蠹役審明正法 先是鉅野縣總捕頭任昆豢盜分贓經盜犯陳青等供爲任昆黨夥雖奉

旨嚴緝而充役爲匪如故御史范公承典訪聞上其事上命密訪嚴拏至是府君嚴提任昆至省而充沂曹濟道某曹州府知府某鉅野縣知縣某以任昆充當捕役破獲多案聯銜具稟保其無他府君弗

聽親提研訊盡得其豢盜分贓情事奏請斬梟將行刑省中譌傳任昆黨與入城欲劫市曹司道府縣咸白府君恐有不測請緩時日府君曰任昆罪大惡極難稽顯戮縱有不測以兵勦之耳何懼爲趣使行刑省中晏然人咸服府君定識

遵

旨察勘惠民等州縣衛秋禾歉收情形請緩徵來年新賦

詔如所請行

是月蒙

賞御書福字自後每歲暮例邀是

賞不復書



